

heeft deese off diergelycke woorden: niet gelyck sommige politycken nu seggen, datmen de predicanen cleyne tractementen moet geeven om henluyden in devotie te houden, seggende daertoe voir redenen, ende geevende den belasten predicanen tot antwoort, als sy by haer coomen clagen, dat de staet vant lant niet lijden can, datmen daer in treeden soude, dattet landt te veel heeft te dragen. Maer ick vrage sulcke politycken off de staet vant landt wel lyden can dat de politycken malcanderen offitien toe schuven van dusenden en meer guldens sjaers? off den staet van 't landt wel lyden can, als men in commissie vant landt is, dat men veel tyts consumeert ende lange besoigneert over saecken, die men in veel corter tyt soude connen affhandelen, omme alsoo haere dag-gelden te hooger te maecken? Off den staet vant landt wel lyden can, dat men op 's lants costen sich selven vol wyns suypt (de vroomen altyts uytgesondert, soo dat men den onreedelicken beesten meer gelyck is, dan den menschen? Off dat de staet vant lant wel lyden can, dat men statuen ende beelden oprecht die veele dusenden costen, ende daervoor men de comptoiren uytputtet, jae noch van sulcke luyden die sulx niet hebben gemeriteert, jae libertinen ende vrygeesten syn geweest, ende gespottet hebben met alle religien. Ick segge dat van sulcke saecken Godt de Heere het lant sal plagen en den kandelaer syns woorts sal wechneemen, ende den honger sal laten overcoomen niet nae broot, alsmede den dorst niet nae water, maer honger ende dorst nae syn woort, exclamerende dat de noot soo groot was, dat men sulcx met basunen moste uytroepen.

Waerop verstaen ende geresloveert is datmen ter saecke vande voorsz. predicatie met den voornoemden Jacobo Levio kerckelick sal handelen, ende syn tot dien eynde gecommitteert om in de kerckenraedt alhier te verschy-